

[0]我哋之間嘅秘密

[1]大家見唔見到我呀？我係坐最後排睇緊書嗰個男仔，我叫阿茶。傳緊紙仔嗰個係我好朋友阿海，睇嚟今日我哋又有秘密行動喇！

[2]同學仔一個傳一個。
我心諗：「傳快啲啦，好想知道佢寫咗啲咩畀我呀！」

[3]有人掂咗下我隻手，然後畀咗張紙仔我。

[4]我一睇，上面寫住：一陣我哋喺飯堂後面等。我望一望阿海，睇嚟又有好嘢玩喇。

[5]（後來我哋至知道，原來同學仔傳紙仔嗰陣已經睇到晒上面寫乜，仲諗緊一陣靜靜雞跟埋去睇我哋有咩玩……）

[6]終於落堂喇！阿海拎住個藍色盒仔出咗去，我跟住佢出去。我哋一去到飯堂後面，阿海就開咗個盒同我講：「殊……睇下，係你最鍾意食嘅薯波呀！」

[7]「多謝阿海，噉我唔客氣喇！」我即刻伸手諗住開餐……
「我哋都唔客氣喇！」成班同學突然喺後面走晒出嚟。

[8]「乜咁多人呀……好啦，噉就一人一粒……」阿海話口未完，大家已經忍唔住口喇！

[9]佢哋食完一粒又一粒，啲薯波話咁快就有晒，淨低我同阿海對住個吉盒……

[10]第二日，阿海又拎咗一盒薯波返學。呢次阿海決定用第二個方法傳話。佢用一條紙綁住一支筆，再喺上面寫字，然後叫隔離嘅同學傳畀我。

[11]嗰個同學諗住呢次又有好嘢食喇，點知一睇，紙上面啲字全部都睇唔明！唯有傳畀下個同學睇。

[12]點知其他同學都一樣睇唔明紙上面啲字！就係噉，條紙傳到去我手上。

[13]我望到阿海對住我舉起支筆，就即時明晒！我學佢拎起支筆，將條紙綁住支筆，啲字就出現返喇：一陣食飯我哋去音樂室等。

[14]而家我同阿海終於可以兩個人靜靜噉食薯波喇！
好多時，朋友之間嘅一個眼神、一個動作，係局內人先會明白嘅！唔知你同朋友係咪都係噉嘅呢？

00161p:《我哋之間嘅秘密》Our Secret

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text:

"Our Secret" (Cantonese), translated by [HamBaangLaang](#) (© HamBaangLaang, 2021), is based on the original story, The Laddoo Code (English), written by Saksham Arora, illustrated by Saksham Arora, supported by CISCO, published by Pratham Books (© Pratham Books, 2020) under a [CC BY 4.0](#) license, first released on [StoryWeaver](#).

[Find out more here: [HamBaangLaang Attribution terms and CC 4.0](#)]
